



Nunatsinni innuttaasut Danmarkimut nuuttarnerat sunik patsiseqarnerseq misissorlugu Naalakkersuisut nalunaarusiorlutik peqquneqarnissaat pillugu Inatsisartut aalajangiiffigisassaattut siunnersuut.

Nalunaarusiaq UPA25 nallertinnagu Inatsisartunut agguanneqassaaq.

(Inatsisartunut ilaasortaq Aqqalu C. Jerimiassen, Atassut)

(Siullermeerneqarnera)

Qujanaq Inatsisartunut ilaasortaq Aqqalu C. Jerimiassen siunnersuummut.

Demokraatinut qularutissaanngilaq, ajornartorsiutaammat, nunaqqatigut taama amerlatigisut nunani allani najugaqarmata nunatsinni najugaqaratik. Pingaaruteqarpoq, arajutsinaveersaartuarnissaat, soq nunaqqatigut nuuttarnerut malinnaavigissallugu.

Ilaanummi soorunami pissusissamisuuginnartumik nuuttoqartarpoq soorlu ilinniagaqarniarluni. Allanut immaqa napparsimaneq pissutigalugu, nunani allani nakorsarneqarnissaq pitsaanerummat. Allanullu aamma immaqa peqquataasinnaalluni, nutaamik misileerusunneq. Qanorluunniit peqquteqaraluarpata, pingaartuuvoq, peqqutigineqartut paasissallugit, politikikkut uagut inuiaqatigiinni tigussaasunik toraartalinnillu pitsanngorsaatinik aallartisisinnaaniassagatta, maani nunatsinni najugaqarnissaq pilerinartunngortinniarlugu.

Siunnersuuteqartoq isumaqatigaarput, pitsaanerpaassasoq misissuilluarnissaq inuit nooreersimasut aperinerisigut, soq nuunnissaq qinersimaneraat. Tassunga atasumik arajutsisimannngilarput, danskit naalagaaffiat taassuminnga nammineq misissuilluni aallartereernikummat. Misissuineq, Det Nationale Forskningscenter for Velfærd (VIVE)-mit ingerlanneqartussa. Taanna misissuineq peqquataavoq Naalakkersuisut Atassummiit siunnersuutit tunuartinnaaniat kissaateqarnerannut.

Soormi aamma danskinit misissuineq naammagiinnassavarput, Danmarkip aalajangerlugulu ilusilersugaan? Eqqortumik oqassaguma, uagut Kalaallit Nunaanni nunaqqatigut ilisarimaneruvagut, isumaqarpungalu, nunaqqatitsinnut toqqissisimanarnerussasoq kalaallisut kalaallinit allanit apersorneqarutta. Ilimagaara, tamanna akissutinik unneqqarinnerusunik atussaanagerusunillu pissarsiffiusinnaanerussasoq.

Eqqarsartaariaaseq qimattariaqarparput, danskit ilisimatuui immikkullu ilisimasallit uatsinnit kalaallinit misissuissallutik tulluarnerusut. Sapiissuseqartariaqarpugut oqarsinnaalluta, uagut nammineq suliarisinnaavagut. Iluaqutaanngilarmi, qiviimiataaginnarutta danskillu ilisimatusarnermut sullissiviannut misissugassaraluagut misissortillugit.

Taamaattumik Demokraatiiniit siunnersuut taperserparput, ataatsimiititaliami susassaqartumi suliareqqinneqarnissa innersuussutigalugu.